



1. oktober 2019

UKA 2019/66  
Aqqalu C.Jerimiassen

**Inatsisip nr. 262, 16. marts 2016 ilanngunnissaannut, selskab-it inatsisaata, inuussutissarsiutigalugu suliffeqarfiutilinnut inatsisaata, inuussutissarsiutigalugu fond-it inatsisaata, inatsisillu tamalaat (Piginnittuiit nalunaarsornissaat eqqunneqarnissaanut) allanngortinnissaat anguniarlugit Naalakkersuisut, Danmark-ip Naalakkersuisuinut attaveqarnissaannut peqquneqarnissaannik, Inatsisartut aalajangiiffigisassaattut siunnersuut.**

(Partii Nalerami Inatsisartunut ilaasortaaitai)

Suliffeqarfiit ingerlanneqarneri pillugit piginnittut kikkueneri maanna ajornannginnerusumik misissorneqarsinnaalernikuupput, tassami GER / IIN atorunnaarsinnerata kingorna Qallunaat nunaanni nalunaarsorsimaffimmut CVR-imut nuukkatta.

Maannali uani saqqummiussaqaartuusup soqutiginaatilik saqqummiuppaa, tassami nunatsinni suliffeqarfiit nunatta iluani aningaasarsiornikut iluanaarutaanerusumik illersungaanerusumillu ingerlanissaanik siunnerfeqarmat.

Takusareeqaarput ukiorpanngortuni ingasammik takornariaqarnerup iluani, Kalaallit nunaannit suliffeqarfiunerartut nunatta avataani piginnittullit aasallu tamaasa nunatsinneersuunngitsunik sulisussaminnik tikerartitsiuartut.

Inuussutissarsiortut A/S-inik ApS-inilluunniit ingerlataqartut ilaat assigiinngitsuarakkaanik suliffeqarfinnik ataani pilersitsiortortarnerat (datterselskab) akileraarutit nunatsinnut isertussaagaluit annaaneqarnerinik annertuumik kinguneqakkajuppoq, inuummi ataatsip pigisaa suliffeqarfippassuarnut agguluussimasinnaasarmat, akiligassanillu iluminni nasseqattaannerisa kinguneranik ingerlatsinermut aningaasartuutaasut ukiumi akileraarfiusumi suujunnaarsinneqavissinnaasarlutik, illuanilluunniit suliffeqarfiit ingerlatat arlaat ukiumi akileraarfiusumi amigartooruteqartussanngortillugu suliarineqartarnera. Tassuunakkut ilanngaatigineqarsinnaasut tamarmik suliffeqarfiup “anaanaannut” iluanaarutaarujussuarsinnaalersarmat.

Tuluttut “loopholes”-inik taaneqartartut avaqqutaariffiusinnaasut, suliffeqarfiit ingerlaneranni nunatsinni atorneqarnissai ajornanngesqaat, tassami inatsisigut taama qasungatigisillugit suliffeqarfiit avatitsinneersut qalooriartornissaanik periarfissittuassavagut, naggataanilu ajornerpaaq pissappat nunaqavissut isiginnaartuinnanngortinneqarsinnaanerinik kinguneqariaannaalluni.

Taamatut Atassummiik oqaaseqarluta siunnersuut ataatsimiitsitaliamut susassaqaartumut ingerlateqqinneqarnissaa innersuupparput.